




SUMBANGAN: Mohamad memberi duit raya kepada anak yatim sambil diperhatikan Naib Ketua Pemuda Umno, Khairy Jamaluddin pada majlis sambutan Aidilfitri 2005.



KEMPEN: Naib Ketua Pemuda Umno, Khairy Jamaluddin membakar patung gergasi nyamuk Aedes sebagai simbolik perasmian program Hapuskan Aedes, Cegah Denggi.



ANUGERAH: Mohamad menyampaikan sumbangan kepada Fatin Nuraidil sambil diperhatikan Naib Ketua Pemuda Umno, Khairy Jamaluddin (kiri) pada majlis penyerahan hadiah kecemerlangan pelajar peringkat Parlimen Rembau.



MESRA: Mohamad beramah mesra dengan pelajar di Kem Waja Diri peringkat kebangsaan 2006 di Felda Sendayan.



PENGUKUH PERPADUAN: Mohamad pada majlis perasmian serentak Persidangan Perwakilan Umno, Pemuda, Puteri dan Wanita Bahagian Rembau.

BH - 11/5/2006

Umno teras perjuangan

Menjulung maruah bangsa, agama, negara

Oleh Ahmad Naim Tahir

TUTUR bahasa berlainan, darah keturunan juga berbeza, adat silam jadi junjangan, tetapi yang penting semangat Melayunya tetap sama.

Umum tahu orang Melayu di Negeri Sembilan majoritinya berdarah Minang, dialeknya lain agak sukar difahami, asalnya dari Minangkabau di tanah seberang, datang merantau lama sudah bersilam.

Hadirnya penjajah turut ditentang, sama bersemangat seluruh negara, Umno wadahnya terus dijulang, parti berjasa... dulu, kini dan selamanya.

Kini, dengan keahlian mencecah ratusan ribu, Umno Negeri Sembilan terus bertapak kukuh dan sehati di hati orang Melayu, menjadi antara kubu kuat setiap kali pilihan raya.

Diterajui muka baru, Datuk Seri Mohamad Hasan, bukan penghalang untuk Umno negeri terus berpadu, sebaliknya lebih banyak pembaharuan dibawa untuk terus memartabatkan parti ke tahap pa-

ling tinggi.

Sebagai Pengerusi Badan Perhubungan Umno negeri dan Menteri Besar, bekas tokoh korporat itu tidak putus-putus mengingatkan ahli parti supaya terus mengukuhkan perpaduan dan tidak sekali-kali menjadi gunting dalam lipatan.

"Parti kita ibarat pokok... kalau kuat akarnya, kuatlah ranting dan pucuknya. Jangan jadi pokok penumpang, seperti parasit yang boleh menumbangkan pokok ditumpanginya.

"Biar sebesar dan seteguh mana pun pokok itu, jika tenaganya dihisap oleh parasit, lama kelamaan ia akan tumbang juga. Kita tidak boleh biarkan keadaan itu berlaku kepada Umno," katanya.

Bagi waris keluarga pejuang Umno tulen ini, parti keramat Umno adalah pusaka turun-temurun, justeru ia perlu dijaga sebaik mungkin, dibajai dan disuburi sepanjang masa.

"Umno adalah pusaka yang ditinggalkan nenek moyang kita. Jadi, kita perlu menjaganya dengan baik untuk diwariskan pula kepa-

da anak-cucu kita selepas ini," katanya.

Bagi Mohamad, hanya melalui Umno, bangsa Melayu dapat dijaga maruahnyanya, agama Islam dapat disemarakkan syairnya, negara dapat dibangunkan dengan jayanya.

Pesanan seperti itu jugalah dituturkan pemimpin negeri terdahulu seperti Tan Sri Dr Mohd Said Mohamed, Datuk Seri Dr Rais Yatim atau Tan Sri Mohd Isa Samad, sekadar menyebut beberapa nama.

Pemimpin datang dan pergi, tetapi Umno akan terus kekal dan perjuangannya meletakkan bangsa, agama dan negara pada tahap paling tinggi terus menjadi teras.

Kini, dengan barisan kepimpinan yang berkebolehan dibantu sayap terasnya, Umno Negeri Sembilan tetap utuh walaupun ada pihak menentang arus berterusan cuba meretakkannya.

Semangat untuk menjulang satu-satunya parti keramat tentunya tambah menggelegak menjelang sambutan ulang tahun ke-60 Umno, hari ini. Selamat menyambut ulang tahun!